



FISTERRA

Lucía Novas

CAMIÑAR cara ó subterráneo, o subconsciente, as fisterras indómitas,
 os largacíos vales, as saborosas froitas, as árbores
 do mundo,
 degustar, correr, levantar
 os dedos, amosar as uñas, mastigar as herbas, esnacar os ritmos,
 circular, macerar o loureiro, esfiunchar nas tardes, pelar
 nos figos, rebentar as uvas, lamber as chatolas, acariciar os gatos,
 albiscar os sons
 no rumor dos paxaros, achar o amor
 en remansos luminosos
 e tebras lizgairas,
 gozar dos amorodos, a milgranda
 da boca, xogar coas pedriñas, facer voar
 as pombas, as taramelas lixeiras, esnaquizar as follas
 en instantes de cristal, remar cara atrás, navegar avante,
 volver ós círculos, rebuscar os labirintos, amosar con orgullo
 os ombreiros espidos, lavar os tecidos, devorar laranxas
 sobre lombo tan nu, experimentar correntes, alzarse
 sobre a vida, correr
 polos carreiros, limpar os seixos, tocar a fruta, lamber os corpos,
 atrapar os instantes, desexar con vehemencia, gozar en brazos
 regalados, agocharse en tobeiras, romper as ilusións,
 volvelas a crear, traficar coa transparencia, asolagar
 espazos, pousar os pés, absorber o ourego, retomar
 a adolescencia, a infancia perdida, lavar a alma,
 asumir os erros, revisitar os mitos, pendurar as plumas,
 elevarse nos outeiros, beixar o pracer, trasladar marés,
 esborranchar na palma, asaltar camiños, seducir bandoleiros,
 recuperar a transgresión, romper barreiras, pescudar
 no centro, buscar as marxes, habitar na periferia,
 retomar as fisterras, idiotizar prexuizos, rachar o fútil,
 aproveitar o pastiche, clarificar a percepción, confluír na espiral,
 limitar o anódino, enxertar pereiras, ceibar as eguas,
 reconfigurar a esencia, procurar o vapor, os trazos esguíos,
 rachar as comportas, buscar o goldmine, a zorra sobre a neve,
 as liñas insinuadas
 sobre peles espertas,
 o subiote, a naftalina, as perlas antigas, as landras xeitosas,
 os rudimentos, os ocelotes, as fiestras, a liberdade.

